



"Aki - Aya" como prome programa di Carnaval a cuminsa na año 1977, na Voz di Aruba riba e frecuencia 1320 A.M. Un espacio sin nomber cu e iniciativa di Django Simons.

"Aki - Aya" su nomber a wordu crea door di e mesun situacion cu nos conoce den e temporada aki: "bo ta 'Aki' bo ta 'Aya'" pa keda cu tur cos.

Django después di 5 año a stop, debi na ocupacionnan periodistico.

"Aki - Aya" a crece di un cuarto di ora, pa mei ora pa un ora . pa dos ora y awe "Aki - Aya" ta tres ora full, yena cu informacion, comentario y tiki di musica.

Mi ta sinti mi satisfecho di por a contribui na nos

Carnaval, door di presenta tur año for di 2 di januari pa diarason di shinishi e programa "Aki - Aya".

Atravez di comentarionan constructivo y informacionnan positivo, sin mester di haci ningun sensacionalismo, "Aki - Aya" a converti su mes den voz di Carnaval. Cu topiconan di actualidad, comentarionan al caso, y criticanan ora esaki ta necesario, segun mi opcion a contribui cu nos Carnaval .

E lo ta e satisfaccion di mas grandi, di por aprecia e acontecimiento cu for di chikito mi a celebra meimei di famia y awe hunto cu mi Señora y yuinan. Ta practicamente imposibel pa splica cu 32 año pasa , mi tabata Pancho Jockey di Carnaval, y cu e mesun festividad ey awe ta celebra 50 año. Wow, y es mas, cu keto bai mi ta formando parti di dje.

Pa e año aki "Aki - Aya" lo mantene e mesun estructura, pero engrandeciendo esaki cu premios, mas entrevistas, e fuente di 'Melle' "mi comer. com", y e tan aclama y spera MOMITO.

Den actividadnan Carnavalesco mi lo tin transmisión via A.T.V.-15 y Magic F.M. E show "Riba - Bow" via A.T.V.-15 a anima algun di e eventonan principal di Carnaval.

Pa loke ta e resto di año mes, mi lo ta hopi ocupa cu Radio y cu voluntad di Dios, mi lo cuminsa dia 7 di maart 2004 cu e show musical BENSHOHO. pa 8or di anochi, p'asina uni e famia arubiano tur diadomingo dilanti pantalla.

nr. 79 (februari 2004)

